



BARAZA LA WAWAKILISHI – ZANZIBAR

ORODHA YA SHUGHULI ZA LEO

BARAZA LA TISA LA WAWAKILISHI

MKUTANO WA KUMI

Kikao cha Thelathini na Moja – Tarehe 27 Juni, 2018.

Kikao Kitaanza Saa 3.00 (Tatu) Asubuhi
na Dua itasomwa.

I. HATI ZA KUWASILISHA MEZANI:

Waziri wa Fedha na Mipango:

Hotuba ya kuwasilisha Mswada wa Sheria ya Kuidhinisha Matumizi ya Shilingi Trilioni moja Bilioni Mia Tatu na Kumi na Tano Milioni Mia Moja Kumi na Nne na Laki Tatu Kutoka Mfuko Mkuu wa Hazina ya Serikali kwa mwaka wa Fedha Unaoishia tarehe Thelathini Juni, Mwaka Elfu Mbili na Kumi na Tisa na Kuruhusu Utoaji na Uhaulishaji wa Fedha hizo Pamoja na Mambo Mengine Yanayohusiana na Hayo.

Hotuba ya kuwasilisha Mswada wa Sheria za Kutoza Kodi na Kubadilisha Baadhi ya Sheria za Fedha na Kodi Kuhusiana na Ukusanyaji na Udhibiti wa Mapato ya Serikali na Mambo Mengine Yanayohusiana na Hayo.

Waziri wa Kazi, Uwezeshaji, Wazee, Wanawake na Watoto:

Taarifa ya utekelezaji wa haki za watoto katika kilele cha maadhimisho ya Ripoti ya Mtoto wa Afrika 2018.

Mwenyekiti Kamati ya Bajeti:

Hotuba ya Maoni ya Kamati ya Bajeti Kuhusu Mswada wa Sheria za Kutoza Kodi na Kubadilisha Baadhi ya Sheria za Fedha na Kodi Kuhusiana na Ukusanyaji na Udhibiti wa Mapato ya Serikali na Mambo Mengine Yanayohusiana na Hayo.

II. MASWALI:

Ofisi ya Rais, Tawala za Mikoa, Serikali za Mitaa na Idara Maalum za SMZ:

274. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Nchi, Ofisi ya Rais, Tawala za Mikoa, Serikali za Mitaa na Idara Maalum za SMZ:

Katika kipindi cha hivi karibuni Serikali imeonekana kukaza kamba na kudhibiti kero za kumbi za starehe hasa baa na muziki nyakati za usiku. Hata hivyo, hali hiyo hivi sasa inaonekana kujirejea hasa maeneo ya shamba zenye shughuli za utalii karibu na makaazi ya watu, maeneo ya mjini na mengineyo hali ni mbaya zaidi.

- (a) Je, Serikali haioni haja ya kuwa na operesheni maalumu ya kila baada ya miezi mitatu kuhakikisha kuwa kumbi za starehe hazileti bughdha kwa wananchi.
- (b) Je, kwanini Serikali imepunguza kudhibiti kero hizo wakati mwanzo imeanza vizuri.
- (c) Hatua gani kali sasa zitachukuliwa kwa zile kumbi za starehe zinazopiga muziki kwa sauti ya juu na kuleta kero kwa wananchi na wanafanya hivyo hata wakikatazwa.

275. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Nchi, Ofisi ya Rais, Tawala za Mikoa, Serikali za Mitaa na Idara Maalum za SMZ:

Mkoa wa Mjini Magharibi umekuwa ndiyo kama Mji Mkuu wa Zanzibar ambao shughuli nyingi za kimaisha zinafanyika hapo. Hata hivyo, kadiri miaka inavyokwenda kumekuwa na ongezeko la nyumba za ulevi (baa) ambazo haziendani na silka na mila za Kizanzibari ambazo zinapaswa kulindwa ili zisichafuliwe kwa kisingizio chochote kile.

- (a) Je, kwani Mkoa wa Mjini Magharibi umelazimishwa uwe Mkoa wa walevi kwa kujengwa baa kila sehemu.
- (b) Serikali ya Mkoa haioni haja sasa kusitisha kabisa utoaji vibali vya kuanzisha baa.
- (c) Hatua gani zitachukuliwa kuondosha baa zinazojengwa kwenye makaazi ya watu.

Ofisi ya Rais, Katiba, Sheria, Utumishi wa Umma na Utawala Bora:

204. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Nchi, Ofisi ya Rais, Katiba, Sheria, Utumishi wa Umma na Utawala Bora.

Kwa muda mrefu kumekuwa na upungufu wa Mwanasheria wa kesi za watoto kisiwani Pemba kwa kuwepo mwanasheria mmoja ambaye kesi zote zilizopo Wete, Chake Chake, Mkoani na Micheweni anakwenda peke yake na kusababisha kushindwa kufanyakazi zake kwa ufanisi.

Je, Serikali haioni ulazima wa kungeza wanasheria wengine ili kesi za watoto zisimamiwe kwa uweledi na watoto wapate haki zao kisheria.

Wizara ya Habari, Utalii na Mambo ya Kale:

262. MHESHIMIWA SULEIMAN SARAHAN SAID (Jimbo la Chake Chake) - Atamuuliza Mheshimiwa Waziri wa Habari, Utalii na Mambo ya Kale:

Katika kuiendeleza Zanzibar hasa katika utalii, Serikali haina budi kuimarisha vivutio vya utalii kama vile Mji Mkongwe pamoja na nyota ya Mji huo Beit-el-Ajaib. Hata hivyo, kwa kipindi kirefu jengo hilo lipo katika hali mbaya sana hata kuweza kuanguka au kushindikana kukarabatiwa na kurudi katika hali yake ya uhalisia.

- (a) Je, Serikali haioni kuwa kuendelea kukaa vile jumba la Beit-el-Ajaib ni kuipotezea mapato Serikali.
- (b) Je, Serikali haioni kuwa tunaweza kulipoteza jumba la Beit-el-Ajaib ambayo ni hazina yetu na tukajuta.
- (c) Je, Serikali imefikia wapi kuhusu matengenezo ya Beit-el-Ajaib.

Wizara ya Kilimo, Maliasili, Mifugo na Uvuvi:

251. MHESHIMIWA ALI KHAMIS BAKAR (Jimbo la Tumbwe) – Atamuuliza Mheshimiwa Waziri wa Kilimo, Maliasili, Mifugo na Uvuvi:

Naipongeza Serikali ya China kwa kutoa “Offer” tenda kwa Serikali ya Mapinduzi Zanzibar kuhusu Wizara ya Kilimo kuliimarisha zao la muhogo kwani wanahitaji kwa kiwango kikubwa bidhaa hiyo nchini kwao.

Na kwa kuwa Zanzibar ina vijana wengi ambao hawana ajira na hiyo “offer” hiyo itatoa fursa ya kuwaajiri vijana hawa.

- (a) Je, Wizara ya Kilimo imewasiliana na Serikali ya China ili kujua aina gani ya muhogo ambao inahitajika kwa ajili ya soko hilo.
- (b) Je, Serikali imeshajihisha vipi wakulima wa zao hili ili waweze kulima zaidi na kufikia mahitaji ya soko linalohitajika.

Wizara ya Biashara na Viwanda:

246. MHESHIMIWA ALI SULEIMAN ALI (Jimbo la Kijitoupele) - Atamuuliza Mheshimiwa Waziri wa Biashara na Viwanda:

Katika harakati za kuwa na Zanzibar ya Viwanda, wananchi wameitikia wito huo kwa ajili ya ujenzi wa viwanda mbali mbali hapa nchini.

Je, Waziri ni viwanda vingapi vimejengwa hadi sasa.

Wizara ya Ujenzi, Mawasiliano na Usafirishaji:

180. MHESHIMIWA JAKU HASHIM AYOUB (Jimbo la Paje) – Atamuuliza Mheshimiwa Waziri wa Ujenzi, Mawasiliano na Usafirishaji:

Baada ya matukio ya ajali za baharini mara mbili nchini mwetu katika kipindi cha miaka michache iliyopita, Serikali imepiga marufuku safari za meli nyakati za usiku. Lakini katika siku za hivi karibuni, utaratibu huo umerudi kimya kimya kwa meli za abiria na mizigo kufanya safari kisiwani Pemba nyakati za usiku.

- (a) Je, kitu gani kimesababisha meli kuanza safari za usiku kwenda Pemba.
- (b) Je, Serikali imejiridhisha vipi kuwa hali ya usalama imezingatiwa katika safari hizo.

190. MHESHIMIWA OMAR SEIF ABEID (Jimbo la Konde)- Atamuuliza Mheshimiwa Waziri wa Ujenzi, Mawasiliano na Usafirishaji:

Mkoa wa Kaskazini Pemba una bandari bubu 162 maeneo mbali mbali ambazo miongoni mwao zina maeneo mazuri ya uwekezaji. Miongoni mwa maeneo hayo wapo wawekezaji ambao wapo tayari kuwekeza na Serikali itajipatia mapato. Maeneo hayo ni Fundo, Ukunjwi kishukashi, Njao, Gando na Mtambwe kwa Wilaya ya Wete na kuanzia Rasi Kiuyu, Shumba Mjini, Msuka, Makangale, Mkiang'ombe na bandari kuu kwa Wilaya ya Micheweni.

- (a) Je, katika maeneo hayo niliyoyataja, kuna maeneo mangapi ambayo yana bandari bubu ambazo zina mazingira yanayofaa kwa ajili ya uwekezaji.
- (b) Je, Serikali haioni kuwa kukosa kuyatumia maeneo ya bandari bubu kwa ajili ya uwekezaji ni moja kati ya mambo yanayotoa fursa kwa watu wabaya kuzitumia bandari hizo.

- (c) Je, ni lini Serikali italisimamia kikamilifu suala zima la bandari bubu kwa kuwapa vibali wawekezaji ambao wanaomba kueleza kwenye maeneo tuliyoyataja.

Wizara ya Ardhi, Maji, Nyumba na Nishati:

105. MHESHIMIWA OMAR SEIF ABEID (Jimbo la Konde)
- Atamuuliza Mheshimiwa Waziri wa Ardhi, Nyumba, Maji na Nishati

Serikali inafanya uhakiki ili kuyabaini maeneo yaliyotengwa kwa uwekezaji. Na kwa kuwa baadhi ya wawekezaji waliopewa maeneo wameshindwa kuyaendeleza kwa muda mrefu na badala yake kuzungushiwa kuta tu pamoja na hati ya ukodishwaji kueleza muda wanaopaswa kuwa wameshaendeleza.

- (a) Je, katika uhakiki huo ni maeneo mangapi ya Nungwi, Kiwengwa, Michamvi, Paje kwa upande wa Unguja ambayo yametolewa hati kwa muda mrefu na bado hayajaendelezwa.
- (b) Je, ni upi uamuzi wa Serikali kwa watu ambao wamezungusha makuta maeneo ambayo wameshindwa kuyaendeleza kwa muda waliopewa.

144. MHESHIMIWA SIMAI MOH'D SAID (Jimbo la Tunguu) - Atamuuliza Waziri wa Ardhi, Nyumba, Maji na Nishati:

- (a) Je, ni eneo gani la nchi kavu pamoja na baharini walilopewa Kampuni ya Ras El Khaimah kufanya utafiti wa mafuta na gesi asilia .
- (b) Je, mkataba wa kufanya kazi hiyo umefungwa lini na wapi.
- (c) Je, endapo patatokea migogoro baina ya kampuni hiyo na SMZ, ni mahakama ipi

itatumika katika kutatua migogoro kitu ambacho hutokezea mara nyingi katika sekta hii ya mafuta na gesi asilia.

Wizara ya Afya:

214. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Afya:

Hivi karibuni kumekuwa na malalamiko katika vituo vya afya kuchelewa kupelekewa dawa kutoka Bohari ya Dawa hali inayosababisha wananchi kununuwa dawa hizo kwenye maduka binafsi. Sambamba na hilo kwa upande wa Pemba, ni muda mrefu sasa hakuna Mfamasia na hivyo hata maduka ya dawa kwa wanaokata Bima hakuna.

(a) Je, Wizara inachukuwa hatua gani kurekebisha hali hii inayojitokeza kila wakati.

(b) Ni lini Wizara itapeleka Mfamasia Pemba.

III. HOJA ZA SERIKALI:

Waziri wa Fedha na Mipango:

Mswada wa Sheria ya Kuidhinisha Matumizi ya Shilingi Trilioni moja Bilioni Mia Tatu na Kumi na Tano Milioni Mia Moja Kumi na Nne na Laki Tatu Kutoka Mfuko Mkuu wa Hazina ya Serikali kwa mwaka wa Fedha Unaoishia tarehe Thelathini Juni, Mwaka Elfu Mbili na Kumi na Tisa na Kuruhusu Utoaji na Uhaulishaji wa Fedha hizo Pamoja na Mambo Mengine Yanayohusiana na Hayo.

Mswada wa Sheria za Kutoza Kodi na kubadilisha Baadhi ya Sheria za Fedha na Kodi Kuhusiana na Ukusanyaji na Udhibiti wa Mapato ya Serikali na Mambo Mengine Yanayohusiana na Hayo.

IV. TAARIFA ZA SERIKALI:

Waziri wa Kazi, Uwezeshaji, Wazee, Wanawake na Watoto:

Taarifa ya utekelezaji wa haki za watoto katika kilele cha maadhimisho ya Ripoti ya Mtoto wa Afrika 2018.

Zanzibar,
27 Juni, 2018.

(Raya Issa Msellem)
KATIBU WA BARAZA.